



Nakon privođenja pomoćnika ministra pravde FBiH Trako kod kuće pod mjerama zabrane

Podnesen izvještaj protiv više osoba, FTV javlja kako sve upućuje da je jedna od njih ministar Zoran Mikulić

Tužilaštvo Bosne i Hercegovine nije zatražilo pritvor za pomoćnika ministra pravde Federacije BiH Hidajeta Traku, već određene mjere zabrane, saopćeno je iz ove institucije.

Kako je precizirano, tužilac Posebnog odjela za organizirani kriminal, privredni kriminal i korupciju uputio je prijedlog za određivanje mjera zabrane za osumnjičenog Hidajeta Traku, koje se odnose na zabr-

anu obavljanja službenih aktivnosti i sastajanja s ostalim osumnjičenim u predmetu „Lutka“.

- S predloženim mjerama zabrane složili su se osumnjičeni i njegov branitelj. Državna agencija za istrage i zaštitu (SIPA) dostavila je u okviru ovog predmeta Tužilaštvu BiH izvještaj protiv više osoba osumnjičenih



**Trako: Jučer
ujutro pušten**

za kaznena djela ometanja rada pravosuđa i zloupotrebe službenog položaja ili ovlasti - navodi se u saopćenju.

Kako je sinoć objavila FTV, jedan od prijavljenih za krivična djela je Trako, a sve upućuje na to da je druga prijavljena osoba, prema izvorima ove televizije, federalni ministar pravde Zoran Mikulić.

Iz Tužilaštva BiH najavili su da će biti nastavljene aktivnosti u borbi protiv organiziranog kriminala i korupcije, kao i u borbi protiv ometanja rada pravosudnih institucija, a s ciljem uspostave vladavine prava i stvaranja što sigurnijeg okruženja za život svih građana BiH.

Trako je, kako saznajemo, jučer ujutro pušten s informativnog razgovora i tokom dana bio je u svom domu u Visokom. S. N.